

## 01

高堂不作壁，招取四面风。  
吹欢罗裳开，动依含笑容。

## 02

反覆华簾上，屏帐了不施。  
郎君未可前，等我整容仪。

## 03

开春初无欢，秋冬更增凄。  
共戏炎暑月，还觉两情谐。

## 04

春别犹春恋，夏还情更久。  
罗帐为谁褰，双枕何时有？

## 05

叠扇放床上，企想远风来。  
轻袖拂华妆，窈窕登高台。

## 06

含桃已中食，郎赠合欢扇。  
深感同心意，兰室期相见。

## 07

田蚕事已毕，思妇犹苦身。  
当暑理絺服，持寄与行人。

## 08

朝登凉台上，夕宿兰池里。  
乘风（月）采芙蓉，夜夜得莲子。

## 09

暑盛静无风，夏云薄暮起。  
携手密叶下，浮瓜沉朱李。

## 10

郁蒸仲暑月，长啸北（出）湖边。  
芙蓉始结叶，花艳未成莲。

## 11

适见戴青幡，三春已复倾。  
林鹊改初调，林中夏蝉鸣。

## 12

春桃初发红，惜色恐依随。  
朱夏花落去，谁复相寻觅。

## 13

昔别春风起，今还夏云浮。  
路遥日月促，非是我淹留。

## 14

青荷盖绿水，芙蓉葩红鲜。  
郎见欲采我，我心欲怀莲。

## 15

四周芙蓉池，朱堂敞无壁。  
珍簟镂玉床，缱绻任怀适。

## 16

赫赫盛阳月，无依不握扇。  
窈窕瑶台女，冶游戏凉殿。

## 17

春倾桑叶尽，夏开蚕务毕。  
昼夜理机杼，知欲早成匹。

## 18

情知三夏熬，今日偏独甚。  
香巾拂玉席，共郎登楼寝。

## 19

轻衣不重彩，飙风故不凉。  
三伏何时过，许侬红粉妆。

## 20

盛暑非游节，百虑相缠绵。  
泛舟芙蓉湖，散思莲子间。

---